

09/05/1997

KKYS berusaha tingkat mutu setiap kursus

Johary Indan

KOLEJ Komuniti Yayasan Sabah (KKYS) yang diwujudkan untuk membantu kerajaan dalam bidang pendidikan akan terus berusaha mempertingkatkan kualiti setiap kursus ditawarkan dari semasa ke semasa.

Tindakan itu termasuk menambah kursus sesuai untuk ditawarkan oleh kolej itu menerusi kerjasama dengan beberapa institusi pengajian tinggi (IPT) tempatan.

Pengarah Yayasan Sabah, Datuk Musa Aman, berkata pihaknya sentiasa peka dengan perkembangan pendidikan, teknologi canggih dan kemahiran ketrampilan diri di negeri ini.

"Wawasan Perdana Menteri, Datuk Seri Dr Mahathir Mohamad, menjadikan Malaysia negara pusat membangun dalam pengendalian Koridor Raya Multimedia menjadi inspirasi Yayasan Sabah untuk memasuki era kemajuan komputer.

"Sesuai konsep itu, Yayasan Sabah menandatangani memorandum persefahaman dengan Universiti Teknologi Malaysia (UTM) mewujudkan kerjasama menawarkan kursus berasaskan komputer di KKYS, April lalu," katanya.

Beliau berkata demikian pada Majlis Konvokesyen Keenam KKYS di Mini Teater, Yayasan Sabah, Kota Kinabalu, semalam. Majlis itu dirasmikan oleh Timbalan Ketua Menteri, Datuk Seri Panglima Joseph Kurup.

Seramai 145 pelajar kolej itu terdiri 50 pelajar bidang teknologi automotif; program binaan dan bangunan (37 pelajar); pengurusan dan perniagaan (36 pelajar); serta kursus kewartawanan (tujuh pelajar).

Berikutan itu, menurutnya, KKYS yang berjaya melahirkan 462 pelajar sejak diwujudkan Mei 1989 sudah mendapat pentauliahan daripada Majlis Latihan Vokasional Malaysia (MLVK), Kementerian Sumber Tenaga Manusia dua lalu.

"KKYS dengan kemampuan yang ada akan terus berusaha melatih belia tempatan berminat dalam bidang kemahiran tangan supaya keperluan tenaga mahir diperolehi.

"Selain itu, KKYS akan mempertingkatkan kemahiran tenaga pengajarnya dengan memberikan peluang mereka mengikuti kursus atau bengkel sesuai dengan bidang mereka," katanya.

Sehubungan itu, Musa berkata, pelajar KKYS yang lulus secara tradisinya diberikan pengiktirafan dengan harapan menjadi pendorong untuk bergerak maju pada bidang diceburi.

Menurutnya, dengan lulusnya pelajar kolej itu, bertambahlah jumlah tenaga mahir untuk melaksanakan hasrat Yayasan Sabah bagi membantu kerajaan negeri memajukan sektor perindustrian.

"Selaras tujuan penubuhan Yayasan Sabah untuk mempertingkatkan serta memberikan kemudahan pelajaran kepada penduduk tempatan, kewujudan KKYS amat adalah sesuai dan tepat pada waktunya," katanya.

(END)